

UMUNSI WO GUSOZA ICYUMWERU CY'UBUREZI GATOLIKA MURI PARUWASI KATEDRALE YA NYUNDO

Tariki 08 kamena 2018 ubwo muri Diyosezi ya Nyundo muri za Paruwasi zinyuranye ziyigize hariye gasozwa icyumweru cy'Uburezi Gatolika, muri Paruwasi Katedrale ya Nyundo, gusozwa icyumweru cy'Uburezi Gatolika cyabereye mu Rwunge rw'Amashuri rwa Kanama Gatolika. Ubwo ibigo by'Amashuri Gatolika byose abanza n'ayisumbuye bibarizwa muri iyi Paruwasi byari bihagarariwe ; imbyino n'ibiganiro ndetse n'imivuga byerekezaga ku Nsanganyamatsiko rusange agira ati : *Muri uyu mwaka w'Ubwiye muri Kiliziya Ishuri ryacu niribe Igicumbi cy'Urukundo n'imibanire myiza.*



Uyu munsi kandi wabimburiwe n'Igitambo cy'Ukaristiya cyayobowe na Padiiri Mukuru wa Paruwasi ya Nyundo Gaspard KANZIRA. Mu gitambo cy'Ukaristiya yakomeje gushimangira ko abana bakwiye kwigishwa bakiri bato kugirirana urukundo hagati yabo. Dore ko uyu munsi wabaye ari mu gihe Kiliziya ihimbaza Umunsi Mukuru w'Umutima Mutagatifu wa Yezu. Yasabye abarezi n'abarerwa gukomeza kurebera kuri Yezu Kristu we Ugira Umutima utuza kandi akoroshya, kandi akadukunda twese, bityo mu mashuri yabo hakaba koko aho kwigira ubwenge butuma abantu babana neza kandi biteza imbere.





Uyu muni ugaragara nk'udasanzwe kuko abanyeshuri bahagagariza impano zinyuranye bifitemo, nabo ubwabo bigatuma bisanzura imbere y'ababyeyi babo n'abarezi babo hagahembwa n'abahize abandi.





Mu ijambo risoza Padiri Mukuru yashimiye abateguye uyu muni bese, ashimira abana uko bateguye ibihangano byabo n'uko bubahirije insanganyamatsiko yatanzwe. Yashimiye kandi ubuyobozi bwa Diyosezi ya Nyundo uko bita ku burezi aboneraho gusaba abarezi bese bari aho gukomeza gukora umurimo wabo wo kurerera Kiliziya n'Igihugu babishyizeho umwete. Kuko uburere ari isiko y'iterambere mu nzego zinyuranye. Yasoje asba ko buri shuri koko ryaba igicumbi cy'urukundo n'imibanire myiza ntibibe iby'uyu mwaka gusa ahubwo bikaba igihe cyose.

Padiri Jean Marie KWIZERA